

Յետ այնք հանեն զփիլոնն. եւ ձեռօք եպիսկոպոսացն մտանէ՝ ՚ի խորանն. եւ անկանի առաջի սրբոյ սեղանոյն մեկն (միայնակ). եւ կղերիկոսքն երգեն *Ղիթանիայն* կարճ, միայն զերկոտասան առաքեալսն եւ երկոտասան մարտիրոսս եւ երկոտասան կոյս եւ երկոտասան խոստովանող: Եւ զկնի զայս՝ ՚ի նոյն ձայն. «Ձճառայս քո զայս՝ աղաչեմք՝ զոր ընտրեցեր թագաւոր, ընկալ լուր մեզ կամօք քո. օրհնեա եւ բարձրացո զսա, աղաչեմք զքեզ, կատարեա եւ լուր մեզ». եւ ՚ի նոյնս յարեն այլ երգ: Երբ լիթանիայն կատարի՝ յառնեն. եւ ունի եպիսկոպոսապետն հանդէպ իւր զԸնտրեալն. եւ հարցանէ զայս. Կամի՞ս մնալ ՚ի սուրբ հաւատս՝ որ է հաստատեալ ՚ի կաթողիկէ եկեղեցւոջ, եւ պահել զնոյնս հաստատուն եւ սուրբ սրտի:– Պատասխանէ. Այո՛, կամիմ:– Եպիսկոպոսապետն ասէ. Կամի՞ս լինել պահապան սուրբ եկեղեցւոյ եւ ամենեցուն որ ՚ի սմա ժառանգաւոր կղերիկոսաց:– Պատասխանէ. Խնդրեմ:– Եպիսկոպոսապետն ասէ. Կամի՞ս փրկել զսոսա, եւ դատել թագաւորութեամբ՝ որ յԱստուծոյ ՚ի քեզ հաստատի, իրաւամբք՝ զոր հարքն քո արարին:– Պատասխանէ. Յօժարիմ, որչափ եւ օգնութեամբն Աստուծոյ զօրանամ. եւ խոստանամ խոնարհութեամբ՝ սուրբ եկեղեցւոյ եւ ժողովրդեանս՝ զամենայն կատարել:

Դառնայ եպիսկոպոսապետն առ ժողովուրդն եւ ասէ. Խնդրէ՞ք կալ ՚ի ներքոյ սորին իշխանութեան, որպէս խոստացան ձեզ պահել զձեզ. եւ ուղիղ հաւատով կամի՞ք հաստատել զսորա թագաւորութիւնն. եւ կատարէ՞ք զսորա հրամանն՝ հնազանդութեամբ, ըստ առաքելոյն Պօղոսի, Ամենայն անձն որ ընդ իշխանութեամբ է՝ ՚ի հնազանդութեան կացցէ թագաւորութեանն, որ է զլուխ ամենեցուն»:– Յայնժամ կղերիկոսքն եւ ամենայն ժողովուրդն բարձեալ զձայնս՝ պատասխանեն չորիցս. *Այո՛, Այո՛, ամէն*: Եւ առ ժամայն խոնարհի Ընտրեալն. եւ ասէ եպիսկոպոսապետն զաղօթս զայս. «Աստուած, որ տիրես ամենայն թագաւորութեանց, օրհնեա զսա թագաւոր մեզ». եւ այլն: Եւ ապա առեալ երկուց եպիսկոպոսաց զձեռանէ նուիրելոյն՝ դարձուցեն զդէմսն յարեւմուտս ՚ի ժողովսն. եւ գոչեցեն բարձր ձայնի ՚ի լուր ժողովրդեանն. «Աստուածային եւ երկնաւոր շնորհն՝ հեղեալ աստանօր առ (Ս. Ա.) կոչէ յաթոռ թագաւորութեան տանս Թորգոմայ եւ զարմիս Հայկայ. օճանիլ ըստ նմանութեան Տրդատայ, Կոստանդիանոսի եւ Թէոդոսի. ըստ ընտրութեան սրբոյ եկեղեցւոյ եւ ամենայն ժողովրդեանն. Արժանի է»: Ժողովս աղաղակէ. *Արժանի է*: Չնոյն երեքկնեն. ապա դարձուցանեն ՚ի սեղանն. եւ կաթողիկոսն ասէ. «Աստուած, արարիչ արարածոց, Աստուած ստեղծիչ աշխարհի, Աստուած որ արարեր զմարդն, ուղիղ իշխանութեան, օճող թագաւորաց», եւ այլն: